



Inatsisartuni ilaasortaq Lars Poulsen, Siumut  
/maani

## Mittarfiit pillugit § 37 naapertorlugu apeqquaqammut 2021-066-imut akissut

Asasara Lars Poulsen

07-06-2021  
Suliaq nr.: 2021 - 10883  
ID. nr. 64791342

Inatsisartut suleriaasianni § 37 naapertorlugu mittarfiit pillugit Naalakkersuisunut apeqquaqateqarputit. Apeqquutitit uannit akineqartussatut innersuunneqarput. Apeqquutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

### **Apeqquut 1. Qaortup Narsallu akornanni mittarfissamut suliarinnittussarsiuussilluni neqeroortitsineq ukiorli naammassinikuvoq, Naalakkersuisut neqeroortunut ajugaasoq qaqugu avammut nalunaarutigineqassasoq naatsorsuutigaat?**

*Akissut:* Neqerooruteqartitsinermi ajugaasoq sanatitsisumut, tassalu Kalaallit Airports Domestic A/S-imut nalunaarutigineqarpoq. Neqerooruteqartitsinerup kingorna Kalaallit Airports Domestic A/S neqerooruteqartunut isumaqatiginninniarluni aallartippoq. Isumaqatiginninniarnert ingerlanerini Kalaallit Airport, neqerooruteqartitsinerup inernerana pillugu paasissutissanik tamanut saqqummiussisinnaangilaq.

#### **Apeqquut 1. a. Qanoq akilimmik neqeroorut isikkoqarpa?**

*Akissut:* Apeqquut 1-imut akissut takuuk.

### **Apeqquut 2. Naalakkersuisut Tasiilami Ittoqqortoormiinilu mittarfiliornissamik pilersaarutigineqareersut ingerlateqqinniarpaat?**

*Akissut:* Naalakkersuisut suli Tasiilami Ittoqqortoormiinilu mittarfiliortoqarnissaanik sulissuteqarnissaq siunnerfigaat.

#### **Apeqquut 2. a Qaqugu suliart aallartinneqassasut naatsersuutigineqarpa?**

*Akissut:* Sanaartugassat aallartinneqannginnerini mittarfiit pilersaarusiorteqartussaapput, aammalu Inatsisartut sanaartornermut inatsimmik akuersisussaapput. Inuiaqatigiit aningaasaqarnerat eqqarsaatigalugu mittarfiit imminut akilersinnaasussaagaluartut, taakku sanaartorneqarnerinut Nunap Karsianiit aningaasanik pisariaqartinneqartunik aningaasaliisoqartariaqarpoq. Aningaasaqarnikkut tamanna pisinnaappat, Naalakkersuisut 2022/2023-mut aningaasanut inatsisissanut siunnersuutunik saqqummiussisinnaalernissartik naatsorsuutigaat. Ukiuumoortumik aningaasanut inatsisini sanaartornermut aningaasanik tulleriarinissaq pisariaqartoq Naalakkersuisut siunnersuutunik saqqummiussereernerisigut pisarpoq, tamatumalu

kingorna aatsaat Inatsisartuni isumaqatiginninniartoqareerneratigut aningaasat inaarutaasumik tulleriarneqartarput.

Oqaloqatigiinnissatsinnut aammalu sanaartornermut, nunatsinni attaveqaatinik pitsannguisussanut aningaasat pisariaqartut immikkoortinneqarnissaat pillugu suleqatigiinnissatsinnut qilanaarpunga.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga

  
Naaja H. Nathanielsen